



# ЛЕНИНЭНЬ КУЯВА

Весэ мастортнэнь пролетарийтне, пурнаводо ейс!

ЛИСИ: 10-це №,  
12 № квкс

1940 ИЕ  
МАЕНЬ  
22-це чи  
57 (1209) №

ВЛКСМ-нь Мордовской обкомонтэ ды  
Саранск ошонь комитетэнтэ газетаст

## Школасо ИСПЫТАНИЯТНЕ

Маень 20-це чистэ ушодовствэ проверочной испытаниятне школатнесэ. Неть испытаниятне сех вадрасто невтсыз сень, кода комсомолось бороцясь ВЛКСМ-нь ЦК-нь X-це пленумонь решениятнень топавтомаст кис, кодат изнякст тейсь учебно-воспитательной роботантэ вадрялгавтомасо.

Тонавтниятне покш радость марто вастызь испытаниятнень. Саранск ошонь 12-це школань тонавтниятне, весе, прок вейке ломань, атак поздая сакшныть испытаниятнес. Эрвасэ эйтэст наряжазь, весела. Испытаниянть максомсто вал мельга зепс а совить, ответить вадрасто ды атак тално.

Тонавтниятне палыть истямо мельсэ, штобу ансяк вадрасто ды отличнасто кирдемс те сех важной экзаменэнтэ. Те парсте неяви Саранск ошонь 6-це школань 8-це классонь тонавтниятнэ Хромовонь примерэнзэ эйтэ. Февраль ковстонть саезь, церынесэ сэрдемань кувалт эзь сакшно школав ды ней кияк эзь арсе, што сон сы испытанияс. Сась ды испытаниятнень максы а беряньстэ. Вадрят показателть рузонь келенть коряс испытаниясо невтсть Саранск ошонь 9-це школань 8-це классонь тонавтниятне (весемест 27), косо вадря оценкат получать 17 тонавтният, отличной оценкат получать 6, остаткатне—посредственна.

Те корты седе, што кода школань дирекциятне, истяжо комсомольской организациятне мезевийсэ анокстасть испытаниятнес, теезь весе эрвикс условиятне испытаниятнень успешнасто ютавтомаст кис.

Но муят аволь аламо истят школат, косо испытаниятнень вастызь беряньстэ анокстазь. Расписаниятне сермадозь а видестэ, консультацият эзь организова. Те иестэ истямо положенияс седеяк корс а кирдеви. Испытаниянть виструкциянть коряс эрва классо аламогавтозь испытаниятнень количествась ды нурькин-гавтозь срокось. Примеркс, бути мелят 4-це классонть ютавтсть 6 испытаният ды испытаниянть срокось ульнесэ 17 чи, то ней ютавтовить ансяк колмо испытаният (письменной рузонь келенть ды математиканть коряс ды устной географиянть коряс). Те максы пек паро возможность парсте организовамс испытаниятнень, целанек подчинить сынст сенень, штобу вадрасто проверямс тонавтниятнень фактической знаянст. Учителесь те иестэ сонсь программа а теи, испытаниятнень ютавты государственной программань кувалт. Теяк максы покш возможность, меленде пек заботямс тонавтниятнень успеваемост кис.

Ней комсомолонть, учительстванть ды школань дирекциятнень мелест должен улемс авозь сенень, штобу а кадоме вейкеяк второгодник.



Искусстванть тевтнень коряс Всесоюзной комитетэсь кемекстась Сталин лемсэ стипендият театральной искусствань Государственной институтонь (Москов) 50 сех вадря студентэненень.

СНИМКАСОНТЬ: Институтонь национальной студиянть студенткатне-отличницатне, конатне кемекстась сталинской стипендиас. Керш ендо витев: Т. М. Очеретлова (Чечено-Ингушской студия), М. Н. Трошва (Коминь студия), С. Г. Тлебузу (Адыгейской студия) ды М. Б. Убушиева (Калмыцкой студия).

Фотось Львовскоень,  
(ГАСС-нь Фото-Клише).

## Васенце чинь результатнэ

Кодамо покш радость марто Саранск ошонь 9-це № Мордовской средней школань тонавтниятне учость испытаниятнень чиньт! Ды вана, окойники, сась те чись! Тонавтниятне ванькстэ оршазь ды веселасто састь школав. Эрванть эйтэст ульнесэ вейке мелезэ: преподавателент эрва кевкстеманзо лангс отвечамс ансяк парсте ды отличнасто. Ды неть мельтнень ламо тонавтният топавтызь тевсэ. Примеркс, VII-це мокшанской классонть (весемезэ 13 тонавтният) 5 тонавтният (Зина Рузавина комсомолкась, Ольга Молдэнова, Зина Бабина ды лият) получать отличной оценкат, 6 тонавтният (Коршунова, Русеев ды лият) получать паро оценкат ды ансяк 2 получать

посредственной оценкат.

Испытаниятнень парсте вастынзе 8-це классось (классной руководителесь С. П. Казанцева комсомолкась). Те классонть ловови 27 тонавтният. Рузонь келенть устной испытаниянть коряс 6 тонавтният получать отличной оценкат. Отличниктнень ютксо ламо комсомолент, примеркс, Альшин, Боткина, Талабаев ды лият. 17 тонавтният испытаниянть максызь вадрасто ды ансяк 4 тонавтният получать посредственной оценкат.

Истяжо а берянь показателть невтсть сеть класснэ, косо руководителекс ульнесэ Е. О. Черепкина, Учелькина учительницатне.

Ю. Баранова.

## Вадря показателть

Успешнасто ютась испытаниянть 1-це чись Саранск ошонь 6-це № средней школасонть. 5-це „А“ классонть весемезэ 26 тонавтният. Рузонь келенть коряс письменной испытаниянть 9 тонавтният (Хуртаева, Нина Коломыцева, Вершинин, Бурмистров ды лият) получать отличной оценкат, 11 тонавтният—паро оценкат. Галя Иванова ды Калеткина иензэ перть получахность посредственной оценкат, испытаниятнень жо сынсь максызь вадрасто. Или вана

Селезнева, Еремеев, Фалилеев тонавтниятнень 4-це четвертьстэнтэ ульнесэ берянь оценкат рузонь келенть письменной роботанть коряс, испытаниятнень максомсто жо получать посредственной оценкат.

Неть успехтнень добовамосонть ламо вий путсь классной руководителесь Кирюкова ялгась ды классонь отличниктне—Наташа Иванецкая, Рая Киселева, Сулимова ды лият.

## Мордовской писательтнень од правлениясь

Маень 19-це чистэ прядовсь Мордовской писательтнень 2-це конференциянть роботазо.

Конференциясь тайной голосованиянть пингстэ кочкась Советской писательтнень Союзонь Мордовской организациянть правления ды ревизионной комиссия.

Правлениянть членкс кочказь: Беззубова Ф. И., Воронин И. Д., Иркаев Н. Л., Карасев А. И., Ку-

торкин А. Д., Родькин С. И. ды Филиппов Н. И. ялгатне.

Ревкомиссиянть членкс кочказь: Кономанин П., Аношкин В., Чекашкин А. ялгатне.

Правлениянть од составонть организационной заседаниясо (маень 20-це чистэ) правлениянть ответственной секретарекс кочказь Филиппов ялгась.

## СЭРЕЙ УРОЖАЕНТЬ КИС

Мордовской государственной селекционной станциясонть од ломанень звенатне роботыть парсте.

П. Давыдовонь комсомольско-молодежной звенась (Пискаева П. Н., Ворныгаева А. М., Попова Н. И. (агроном) ды Кочетовская Г. М.) сайсь эсензэ лангс обязательстват: получамс урожай—озимой розень ды товзюронь 11 гектартнэстэ 20 центнердэ а седе аламо эрва гектарстонть, озимой розень 2 гектартнэстэ 30 центнерт эрва гектарстонть, озимой товзюронь 1 гектарстонть 25 центнер.

Видемась ульнесэ седе мейле, зядро раужо паринавтенень внесли навоз ды минеральной удобреният, ютавтозель тельня ловонь, тунда ведень кирдема. Апрельень 8-9 читнестэ теезель подкормка (суперфосфат 1,25 центнер, калийной соль 48 килограмма, аммиачной селитра 56,8 килограмма эрва гектарс).

Ней звенась кундась эсензэ видевтнень изамонтень, тень парсте теаманзо кис кувалгавтозь построкатне.

Звенась арси чуро таркатнева теамс подсаживания ды чурокстом пек седе таркатнень.

Оземтнень трубкас лисемадост икеле карми улеме 2-це подкормка (минеральной удобрениясо), озимой товзюронть участкасо—навозной жижасояк. Навозной жижадонть звенась пурнась 10-шка боцька.

Озимой розенть состояниязо пек паро.

Грециянть коряс звенась (звеньевоезь Гуцин) эрва гектаронть лангс внес удобреният: 3 центнерт суперфосфат ды 1 центнер калийной соль. Шкасто ютавтынзе ранней изамонтень ды культивациянть.

Парсте роботасть комсомолецтнэ С. Адушкин ды Н. Захаркин.

В. Гуцин.

## А сатни посадочной материалось

Минь, Мордовской государственной селекционной станциянть роботниктне, сайнек эсенек лангс обязательства озавтнемс 2 гектарт (800 корент) вишнят ды 0,25 гектар шукшторовт (500 курот), но посадочной материалонь аразьчись кирди минек обязательстванок топавтоманть. Озавтвинек ансяк 150 корен вишнят.

Мордовиясонть улить 4 плодовой питомникт, конатнесэ арасть вишнянть посадкат. Инсарской питомникесэ истя жо не может обеспечить потребностнень шукшторовонь посадкатнень коряс.

Мордовской АССР-нь НКЗ-нь плодовоощной управлениянть эрви теамс учет сенень, зяро теди-де сексентень эрви посадочной материал, ды ускомс те материалонть лия областень питомниктнестэ.

В. Г.

## КОМСОМОЛЬСКОЙ ЭРЯМОСЬ

### „Парижская коммуна“ колхозонь комсомолецтнэде

ВКП(б)-нь с'ездэс келейгавтызе комсомолонь деятельностьензэ государственной ды политической эрямосонь. Комсомолонь задачатнень парсте чарькодизь, Манадышской велень „Парижская коммуна“ колхозонь комсомольской организациясь кеместэ кувдась сынст топавтомантень. Колхозонь партийной организация арась. Те пугы комсомольской организациянь лангс покш ответственность весе хозяйственно-политической кампаниятнень ютавтомат кис. Штубу седе вадрясто возглавить политической ды хозяйственной кампаниятнень ютавтоманть, комсомольской организациясь (комитетень секретаресь Игнатев ялгась) кармасть ветямо покш политической работа колхозниктнень ды од ломатнень ютксо. Тень результатсо организациясь 7 ломаньстэ кассь 45 ломаньс.

Колхозось весе роботатнесэ районсонть зани васенце таркатместэ вейкенть. Вадрясто ютавтызе тунда видеманть. Паксянь роботатнесэ комсомолецтнэ невсть пример колхозниктнень ды аволь союзной од ломатнень.

Колхозонь ды советской ответственной весе роботатнесэ роботыть комсомолецт. Комсомолонь комитетень секретаресь Игнатев ялгась роботы вельсоветэнь председателксь, вельсоветэнь секретарькс роботы Афония комсомолецэсь, клубонь заведующеексь

Денисова ялгась, конюхокс Василий Иванович Митянин. Митянин ялгась икелень конюхонть пельде лишметнень примакшнынзе берянь упитанность марто. Сон жо добросовестной уходсонзо лишметнень пачтинзе вадря упитанностьс.

Паксянь стантнэс обед шкане комсомолецтнэ колхозниктнень свал ловность свежа газетат. Комсомолецтнэнь вийсэ невтезельть колмо постановкат. Культурномассовой роботанть сех вадрясто ветясть Новцов, Филатов ды Гришин ялгатне. Паксясо роботыця комсомолецтнэ Кукин, Беляков нормаст топавтнестэ 200 процентс.

Тунда видеманть прядомадо мейле организовать специальной звена веточной коромонь, анокстамонть коряс.

Комсомольской организациясь а стувтнесы оборонной роботанть-как. Весе комсомолецтнэнь улить ГСО-нь значокост. Сеть комсомолецтнэ, конатнень еще арасть ворошиловской стрелоконь значокост, анокстыть сонзэ лангс норматнень максомантень.

Теке марто сави телкстам комсомольской организациянь лавшо енксонзояк, те се, што тунда видемань шкастонть стувтызе ВКП(б)-нь историйанть тонавтнеманзо. Сави надеямс, што комсомольской организациясь витьсы те асатыксэнзэ.

П. Кильдюшкин.

Атяшевской район.

### Совить комсомолс

„Память Кирова“ колхозсонть роботыть замечательной од ломать, но сынст марто кияк кодамоак работа эзь ветя, комсомольской организация арасель тосо. Ансяк седе мейле, зардо ВЛКСМ-нь райкомонь бюронь членэсь Чудаев ялгась те колхозонь од ломатнень ютксо виегавтызе политиковоспитательной роботанть, ней тосо ули организовазь комсомольской организация 13 ломаньстэ. Комсомолс соваст колхозонь сехте вадря од ломатне, пример-

ной производственниктне ды активной общественниктне (Акмайкин, Гордеев, Сарайкин ды лият), конат достойнойть кандомс Ленинско-Сталинской комсомолонь элементь.

Ней кода комсомолецтнэнь, истяжо аволь союзной од ломатнень ютксо ветяви покш политической работа.

Каминин,

ВЛКСМ-нь Шайговской райкомонь секретаресь.

### Вадря агитатортнэнь опытэст—весеменень достояниякс

Комсомолецтнэнь кровной тевест—систематически ветямс агитационно-массовой работа паксянь бригадатнесэ ды звенатнесэ. Те важнейшей роботась тунда видемань шкастонть седе а ков лавшосто ладязель Кочкуровской райононь колхозтнэсэ. Комсомольской райкомонть „инициативанзо“ коряс тунда видемань шкастонть ульнесь организовазь агитбригада. Те агитбригадась колхозонь паксятнесэ эзь лисне. Комсомолонь райкомонь работниктне (секретаресь Забиякин ялгась) агитбригадань роботанть сатышка мель эзь яво.

Тунда видемань перть кой-кона колхозонь паксятнесэ арасель ютавтозь агитмассовой работа. Истя, примеркс, „18 партс,езд“ колхозсонть (Вирь ало Тавла веле) 18-це тракторной бригадасонть агитаторт арасельть, газетат эзь ловно.

Еще седеяк беряньстэ тевесь ашти Воеводской вельсоветэнь комсомольской организациясонть

(секретаресь Тюлюков ялгась). Те организациясонть ловови 20 комсомолец, но агитаторкс эйтэст кияк а роботы. Колхозниктнень ютксо те шкас эзизь толкова СССР-нь Верховной Советэнь 6-це Сессиясонть Молотов ялганть докладонзо. Комсомолецтнэ а кепедить эсест политической уроченест, ВКП(б)-нь историйанть самостоятельна кияк а тонавтни. Сонськак Тюлюков ялгась еще эзь тонавтне вейкеяк глава.

Нама, Кочкуровской районсонть улить пек вадря комсомолецт-агитаторт, конат честь марто оправдали Ленинской комсомолонть довериянзо. Вана, примеркс, „Красный факел“ колхозонь (Мурань веле) А. Данилкин комсомолецэсь агитаторсь колхозниктнень ютксо ютавтсь 54 беседа, косо толковась партиянь ды правительствань решениятнень, социалистической соревнованиядо простознэнь. Данилкин ялгась нолдась ламо стеной газетат.

Комсомолецтнэ кепедить эря-

### КОВ ИЛЯ ВАРШТА—БЕЗОБРАЗИЯ

Эрва кодамо чинедеть судоварят лазовить „Общепитэнь“ омбоце № столовойсэнтэ. Те чинесь качады кухнястонть, посудань шлямонь ды кельме закускань анокстамонь цехтнестэ. Тосо рудазось суронь сэрсьсэ, шкапнева, косо кирдить кши ды лия продуктат, ваялить каладо туфлят ды галошат.

Варштатано буфетс. Тосоак безобразия. Железнова буфетчицась 200 грамм винигретэнтэ таркас микшни ансяк 125 грамм, 200 грамм капста-пряканть таркас—178 грамм ды манчи лиясо коймейсэ.

Столовоень заведующеесь Королихин ялгась весе неть безобразиятнень лангс ваны равнодушнасто, прок бутэ истя эрвияк. Те столовойсэнтэ роботыть 3 комсомолецт—Девяткин (учетчик), Кудашов (калькулятор), Шарагина (официантка), но инициатива сын кодамоак а невтить, уликс асатыкстнэнь каршо а бороцить.

Первичной комсомольской организациянь секретаресь Цыганов ялгась комсомольской собраниясо вестькак эзь аравтне вопрос столовоень роботадонзо.



Боевой ды политической подготовкань отличникесь танконь командирэсь орденоносецэ А. А. Тимофеев (Первой Отдельной Краснознаменной Армия).  
Фотось Худовонь.  
(ТАСС-нь Фото-Клише).

### Западной Европасо войнась

Воевиця енкстнэнь штабост сводкатнень коряс ды иностранной печатенть сообщениянзо коряс, фронтнэсэ положениась маень 20-це чинтень ульнесь истямо:

Голландиясо германской войскатне, северной морянь побережьятнень лисезь ды тосо кемекставозь обеспечивают эсест войскатнень вить флангост, кона частне действуют Бельгиясо. Антверпенэнтэ эйтэ юго-запад ено районсонть союзниктнень войскатнень упорной сопротивлениаст изнязь, германской мотомеханизированной соединениятне лиссть Шельда лентень, яла панить союзникнень войскатнень. Тешкстневи Ла-Маншонь гавантнень английской войскатнень бойкасто потамось.

Брюсселентэ эйтэ юго-запад ено районсонть союзниктнень танковой соединениятне снартнестэ контратаковамс германской частнень, но успехтеме. Контратаканть отражениянзо пингстэ истожазь союзниктнень малав 20 танка. Германской частнень тылсэнтэ яла тейнить упорной сопротивлениа Льежэнь ды Намюронь башка фортнэ. Тенень максневи покш значения, секс што неть пунктнэнь трокс ютнить весе сехте важной чугунокань кинь линиятне, конат ветить фронтонь.

Северной Франциясо германской мотомеханизированной соединениятне яла развивают прорывенть северо-запад енов. Пек виев бойть молить Ле Като—Ля Фер фронтсонть. Кой-кона участкатнесэ германской ды французской отрядтнэ действуют вейкест-вейкест тылсэ.

Монмеди районсонть (Седанонть эйтэ юго-восток ено) германской частнень атакаст ульнестэ отбитойть. Отбитойть истя жо немецтнень снартнемаст ютамс Эн лентэнь трокс Ретеленть маласо. Эльзасо союзниктне сезизь весе сэдтнень каналтнэнь трокс, ды истяжо сэдтнень Сан—Луи—Базель чугунокань кинь лангсо, кона сюлми Франциянть марто Швейцариянть. Союзниктнень авиациясь маень 19-це ды 20-це читнень перть таго бомбардировинзе Гамбургсо, Бременсэ ды Ганноверсэ бензинохранилищатнень. Английской авиациянь действиянзо туртов характернойкс ашти се, што германской оштнень лангс весе налетнэ маень 18-це ды 19-це читнестэ тейневсть ансяк веть.

Германской авиациясь действовал наземной войскатнень марто вейсэ Бельгиянь ды Франциянь территориясонть противникенть живой виензэ каршо.

(ТАСС).

### Англиясь ды Франциясь рамасть самолетт США-сто

Французской закупочной комиссиясь яволятсь, што Англиясь ды Франциясь меельсь кавто недлятнень перть заказасть США-со самолетт ды моторт 150 миллион долларонь суммас. Меельсь 4 недлятнень перть англо-французской заказтнэнь суммась пачколи 350 миллион долларс. Американской печатенть сведениянзо коряс, Англиясь ды Франциясь заказасть США-со меельсь 4 недлятнень перть 4 тыщат самолет.

(ТАСС).

Ответ редакторонь заместителесь  
А. ТАРАСОВ.